

# **Visoki predstavnik donio odluke o budžetu Federacije za 2003. godinu**

Visoki predstavnik Paddy Ashdown je u ponedjeljak donio Odluku kojom se proglašava budžet Federacije BiH za 2003.godinu, kao i Odluku kojom se proglašava Zakon o izvršenju budžeta Federacije BiH za 2003. godinu.

Visoki predstavnik je poduzeo ovaj korak kao odgovor na zahtjev koji mu je uputio Zastupnički dom Parlamenta Federacije. Zastupnički dom je tražio od visokog predstavnika da intervenira zbog činjenice da Dom naroda Parlamenta Federacije još nije uspostavljen, te se zbog toga nije mogao usvojiti budžet Federacije na vrijeme da bi se ispunili uvjeti koje je postavio Odbor MMF-a. Ispunjavanje tih uvjeta je potrebno da bi se u obzir uzeo nastavak stand-by aranžmana i isplata druge tranše ovog aranžmana. Iznos ove tranše je približno 15 miliona US dolara.

Ostala sredstva čija bi isplata bila dovedena u pitanje da budžet Federacije nije usvojen i da je prekinut stand-by aranžman MMF-a obuhvataju program makroekonomske pomoći Evropske unije (u iznosu od 60 miliona eura), čija prva tranša od 15 miliona eura treba uskoro da bude isplaćena, te kredit Svjetske banke u iznosu od 20 miliona US dolara.

Visoki predstavnik je izjavio: "Donio sam ovu odluku kako bi osigurao da građani BiH ne izgube ova sredstva od suštinske važnosti zbog činjenice da Dom naroda nije uspostavljen na vrijeme".

Budžet za 2003. godinu i Zakon o izvršenju budžeta su usvojeni na sjednici Zastupničkog doma Parlamenta Federacije dana 10. decembra 2002. godine. Parlament Federacije mora usvojiti ova

dva zakona čim se uspostavi Dom naroda.

Lideri političkih stranaka koje imaju svoje zastupnike u Zastupničnom domu BiH su uputili pismo MMF-u dana 11. decembra u kojem su se obavezali da će Dom naroda BiH, čim se uspostavi, po hitnom postupku razmatrati nacrt budžeta za 2003. godinu, koji je u okviru ograničenja potrošnje definiranih od strane MMF-a i koji je Zastupnički dom već usvojio. Visoki predstavnik smatra da će ovo zadovoljiti MMF i pokazati da su institucije BiH spremne da ispune uvjete iz stand-by aranžmana.